

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IULAI 2024

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws

FAAPAIA FANUA MAOTA TINA I PAPAUTA



EFKS LOIMATA O APAULA



TALA FOU MO SULU TUAI



Maota Fou o le Faafeagaiga & Aiga



F. Tolua, Erica Dias, Eleanor Kleiber & Tina Tasi

O LE FAASINO UPU

1. O LE LAUGA.....2
 2. MAOTA MAFUTAGA AOAO TINA....4
 3. PEPA SAUNIA DR. A. PALAAMO FS....5
 4. O LE PEROFETA MULIMULI...10
 5. EFKS LOIMATA O APAULA....14
 6. KOPI O SULU TUAL.....15
 7. FEAU O LE ASO IA IULAI.....15
-

O LE LAUGA

(I le Suafa o le Tamā, o le Alo & Agaga Paia)

Tusi Faitau: F. Tuai - Teuteronome 4:4
F. Fou - Roma 1: 16-17

Manatu Autu: **O LE AMIOTONU A LE ATUA**
MALE FAAOLATAGA

Matua: Roma 1:16-17, *“Auā ou te lē ma i le Tala Lelei ia Keriso, auā o le mana lava lea o le Atua e ola ai i latou uma o e faatuatua, e muamua le Iutaia atoa ma le Eleni. Auā ua fa’aalia mai ai le amiotonu a le Atua i le faatuatua; ina ia faatuatua ai, e pei ona tusia; E ola le tagata amiotonu i le faatuatua.”*

O le fesili: O le a le amiotonu? O le amio ua tonu. E leai se leaga. E mamā ma e le faia se mea sese e tasi. Amio sa’o ma le atoatoa. O le uiga lea o le amiotonu a le Atua, o le Atua na te le faia se mea leaga e tasi. E inoino i le leaga. E tonu ana faamasinoga uma. E le faapito foi lona alofa O le alofa ma le alofa mutimutivale. E faia lava e la le mea sa’o ma ua tonu. O lana amiotonu, e na te faasala ai ma a’oa’i le tagata ia fai se mea sa’o ma le mea tonu. O le Atua e paia, mamalu, silisili ese le mamā.

O lenei lalolagi o loo i aao o le Atua amiotonu. Afai o le Atua amiotonu, o le a le mea e tupu i le lalolagi i le lumanai? Afai o le Atua o le amiotonu,

e tatau ona la faasala tagata uma ma mea uma o loo ua faaleagaina le lalolagi mo i tatou. E i ai le aso; o loo fetalai mai ai i le Tusi Paia. E leai se tasi e sao mai lea aso, aua ua uma ona faamaumau i le lagi. E i ai le aso e totogi ai au agasala. Peitai, ua faatuatuai lea fuafuaga a le Atua, ona o Lana fuafuaga i le faaolataga mo tagata ia Iesu Keriso. Ua finagalo le Atua e ala mai ia Iesu Keriso Lana amiotonu ina ia ta’uamiotonuina le tagata. Aua e le mafai e se tagata ona tula’i i luma o le Atua, aua e leai se amiotonu a le tagata.

O le ala faapea mai lea o Paulo i lana Tusi lenei i le Ekalesia i Roma, *“Auā ou te lē ma i le Tala Lelei ia Keriso, auā o le mana lava lea o le Atua e ola ai i latou uma o e faatuatua, e muamua le Iutaia atoa ma le Eleni. Auā ua fa’aalia mai ai le amiotonu a le Atua i le faatuatua; ina ia faatuatua ai, e pei ona tusia; E ola le tagata amiotonu i le faatuatua.”*

O le mea lea o loo tupu i le Ekalesia i Roma, ua fe’aina’i ta’ita’i Iutaia, ma ta’ita’i o nuu ese, i latou o loo i le Ekalesia lenei. E foliga mai o loo tata mamau lava ta’ita’i Iutaia i a latou uputuu ma le tulafono. Ua le fiafia ai ta’ita’i o nuu ese o le lotu. A e ua ta’u atu e Paulo i le Ekalesia i Roma e faapea, o i latou uma ua talitonu i le Tala Lelei, pe ua avea ma kerisiano, ua valaaulia e Iesu Keriso.

- (1) Ua aofia i le aiga o le Atua.
- (2) Ua avea ma tagata o le Atua.

O se fa’aaliga maoa’e tele ma le matagofie lea ma le faafiafia lotu i soo se kerisiano, i le toe fanaufouina i le aiga o le Atua. O se fiafiaga uiga ese ma le logo lelei. E maua ai le alofa ma le tele o faamanuiaga. Talu ai o ia mea uma ua saunia e le Atua mo i latou. Tatou te finau malosi ai ia avea i tatou ma ana tagata paia.

O le feau e aga’i muamua i tagata Iutaia ona o i latou ua sili atu ma le 2,000 tausaga o avea ma tagata filifilia o le Atua. Talu mai lava ona filifilia e le Atua Aperaamo, ma folafola ai le manuia tele i e fananau mai ia te ia. (Kenese 12:1-3). E le’i filifilia e le Atua ia Eperu po o Isaraelu ona o so latou lelei. E leai. (Teutero.7:7-8; 9:4-6). A e ona o lona finagalo ina ia fa’aalia lona alofa ma lona agalelei ia i latou, aua o i latou nei e ala mai ai le Mesia o le a afio mai i le lalolagi. Na filifilia e le Atua i latou, e le ona faapea ua fiafia le Atua ia i latou, e leai, a e ia latou ta’u atu i le

lalolagi lana fuafuaga mana i le faaolataga mo le lalolagi agasala. O le fuafuaga mana a le Atua, ona ua Ia salamo, ana iloa e le faia le tagata ina ua mae'a ona faia mea uma. Aua ua agasala atu le tagata ia te Ia. Amata mai lava i le ulua'i tagata, sosolo mai ai, ina ua toasa le Atua ma faaumatia le lalolagi muamua. Le taimi o Noa. Ua na o Noa ma lana fanau na sao mai le lolo. Ola mai le fanau a Noa ma ua tupu ma uluola e oo mai ia Aperaaamo. Na filifilia e le Atua Aperaaamo ona o le tagata e fiafia i le Atua, ma ua lelei lana amio i le silafaga a le Atua. Ua filifilia e le Atua e ala mai ai le nuu mo lona faamoemoe. Peitai ua toe agasala tagata. Lea na oo mai ai le afi ia Sotoma ma Komoro, ina ua leai lava se tasi e tonu lana amio i luma o le Atua. O le amiotonu lea a le Atua.

O le mea moni, e leai lava se amio ua tonu i luma o le Atua. Ma e leai lava se tasi e sao mai le aao malosi o le Atua i le taimi e faasala ai e le Atua le tagata. Peitai ua finagalo alofa le Atua i le lalolagi, e i ai lana fuafuaga mana lea ua filifilia ai Isaraelu e faataunuu. E tele senituri na a'oa'oina ai Isaraelu (Jews) e uiga i le Atua, e ala i le ususitai ma tausi i ana tulafono, tausi ana Aso faailogaina, ma ola e tusa ma lona finagalo. E masani, o nisi taimi e galo ai ia i latou le folafolaga (promise) ma le tulafono a le Atua, ona faapea lea ona a'oa'iina i latou (discipline), a e peitai o loo i ai lava lo latou faasinomaga taua (heritage) o le talitonu i le Atua moni. O le Atua o tagata uma o le laueleele.

Ma sa tatau ai ona leva ona sauni Isaraelu e talia le afio mai o le Mesia, ma malamalama i lana talaiga ma lana feau. Peitai e itiiti lava i latou sa talitonu ma malamalama (Luka 1:25, 36-38). O le ausoo o Iesu ma le aposetolo iloga o Paulo. O latou ia o Eperu faamaoni na latou iloa o Iesu Keriso o le meaalofa sili lea a le Atua mo tagata uma. O le mea lea ua fai mai ai Paulo e pei ona i ai le tatou matua, "*Auā ou te lē ma i le Tala Lelei ia Keriso, auā o le mana lava lea o le Atua e ola ai i latou uma o e faatuatua, e muamua le lutaia atoa ma le Eleni. Auā ua fa'aalia mai ai le amiotonu a le Atua i le faatuatua; ina ia faatuatua ai, e pei ona tusia; E ola le tagata amiotonu i le faatuatua.*"

O lona uiga e leai lava se amiotonu a le tagata. E le mafai foi ona sola se isi i le toasa o le Atua, pe a oo mai i le tagata. E le feagai foi le tagata agasala ma le mamalu, ma le mama ma le paia o

le Atua. Peitai o le Tala Lelei o loo faailoa mai ia i tatou e le gata o le amiotonu a le Atua i lana fuafuaga mamana mo i tatou ia lavea'iina, a e o loo faailoa mai ia i tatou pe faapefea ona tatou sao atu i le malo e faavavau. O le tali atoatoa ma talitonu ia Keriso, o le Alii ma le Faaola ona faato'a ta'u amiotonuina lea o i tatou i le silafaga a le Atua. Mai le amataga e oo i le gataaga. Ua folafola mai e le Atua, ina ia ta'ulelei ma ta'uamiotonuina le tagata ia te Ia ona o le faatuatua moni ia Iesu Keriso. E ola tagata uma, pe lutaia pe tagata ese, i le iloa ma faatuatua i le Alii o Iesu Keriso. Na o le faatuatua lava ia Iesu Keriso. Ia iloa e le tagata, ua le toe manatu le Atua i agasala a le tagata i le taimi ua te'a, a e tatau i le tagata ona tuu uma ana agasala ia Iesu, aua e le mafai ona tula'i se isi i luma o le Atua pe a le ui atu ia Iesu Keriso. O Iesu o le *passport* lea o le tagata e tula'i ai i luma o le Atua.

Lea e fai mai ai Paulo, o le faaolataga e le o galuega ma le tulafono, a e o le faatuatua ia Iesu Keriso le Alo o le Atua, lea sa maliu ma toe tu mai le oti (Roma 3:21-31, 4:1-25). E le ta'uamiotonuina se tasi i luma o le Atua i galuega o le tulafono; aua o le tulafono e iloa lelei ai le agasala. Ua aumai ai e Paulo le upu a le perofeta o Sapakuka 2:4. Faauta, o le na te faafefeteina e le tonu lona loto i totonu ia te ia; a o le ua amiotonu e ola ia i lona faatuatua. O loo fa'aalia mai ai, a tatou talitonu ma faatuatua ma le faamaoni ia Iesu Keriso o le Alii ma le Faaola, ona lavea'iina lea o tatou; tatou te feola pea nei ma e faavavau. O le ala lea tatou te maua ai le faaolataga.

O le a le faatuatua ia Iesu Keriso? O le talitonu lea ia te Ia ma usitai i ana poloaiga. O lona uiga o le faalagolago atoa lea ia te Ia ma talitonu i ana a'oa'oga. Faailoa atu le moni ma le faamaoni o mea uma na faailoa mai i ana fetalaiga. O le tatalo i le suafa o Iesu e fesoasoani lea ia i tatou e faailoa atu le Tupu Aoa ma le silisili ese o le Atua.

O le feau foi lea a le Tala Lelei mo tatou. O tatou e leai lava so tatou amiotonu. E leai foi se isi o tatou e mafai ona sola ese mai le toasa o le Atua. E tatau foi le tatou sala aua fai mai Isaia, o i tatou e tusa ma le mea leaga i tatou uma. "*O a tatou amiotonu uma e tusa ia ma le 'ie o le ma'i. Ua mamea i tatou uma e pei o le lau laau, o a tatou amioletonu e pei se matagi ua lelea ai i tatou.*" O lo tatou iuga lava o le lafo i le afi. E pei i tatou o ni otaota, aua ua na o otaota e lafoa'i i le afi.

Peitai, o le alofa tunoa o le Atua ua tuuina mai ia i tatou, ia tatou amiotonu ai, ua ala mai ia Iesu Keriso le Alii ma le Faaola. O le tala fiafia mo tagata uma, ia tatou tuu atu o tatou agasala ia te Ia. O le a tuuina mai lana amiotonu ia te i tatou. O se fetuunaiga ina a matagofie. Ua tuuina mai e Iesu Lana amiotonu ia i tatou, ina ia ta'uamiotonuina i tatou i luma o le Atua. O le faaolataga e le faigofie ona tatou maua. O Iesu Keriso o le Faaolataga lea mo tagata uma. O le amiotonu lea mai le Atua. E le faapitoa i se vaega. O tagata soifua uma. O le Tala e sili ona lelei. E leai se mea e leaga ai. Fai mai Paulo, *o Ia e le iloa se agasala, a e ua sauaina pei o se tagata agasala mo oe ma a'u, ina ia ta'uamiotonuina i tatou ia te Ia.* Ua fetalai foi Iesu, *“O a'u nei le ala, ma le upu moni, ma le ola. E le alu atu lava se tasi i le Tama, pe a le ui mai ia te a'u.”*

O Iesu Keriso foi le faaolataga ua saunia e le amiotonu o le Atua mo i tatou uma. Ia talitonu, usitai i ana poloaiga ma faalagolago ma le loto atoa ia te Ia ma le faatuatua faamaoni, ona ta'uamiotonuina lea o i tatou i luma o le Atua. O lana amiotonu, na afio mai ai Iesu Keriso, lona Alo pele e toatasi i le lalolagi; na maliu tiga i luga o le satauro, a e na toe tu manumalo ma le oti ma le tuugamau. O le faaolataga ua lava totoe ma lelei saunia, mo i tatou uma e talia i le salamo ma le faatuatua atoatoa ia te Ia.

Ia tumau i le Atua le viiga, le faamanu ma le faaneetaga e faavavau, faavavau lava. Amene.

Saunia susuga Tanielu Tupuse FS,
EFKS Patamea,
Matagaluega ITU O TANE.

AMATA LE MAOTA **MAFUTAGA AOA O TINA.**

“E au le inailau a Tina” o le muagagana masani lea a le atunuu faasino i le saili malo o le itupa a Tina ma Tamaita'i, e faaeaina ai aiga ma nuu, o le atunuu aemaise le galuega paia a le Atua ma lana Ekalesia. E faapea le agaga maua o le saunoaga a le Taitai o le Sauniga na faapa'iaina ai le laueleele i Papauta, o le a fausia ai le Maota Tele a le Mafutaga Aoa o Tina. O le aso 12 Iulai na faataunuu ai le sauniga mamalu, na ta'ita'iina e le afioga Taitaifono Fono Tele, susuga Tunumoso Soliola Iosia FT, e ofoina atu ai leni vaega o le fanua o le Ekalesia Aoa i Papauta, mo lea foi galuega tele ua alo atu i ai le Mafutaga Aoa a Tina i leni vaitau ma nei auga tupulaga. O se miti lava ua leva ona tofa i ai le Mafutaga Aoa Tina, ma ua mae'a foi ona liuliu i ai le moe ma le uta, ma ua faai'ugafonoina, ina ia fausia le maota tele e tapuvae tasi i ai fuafuaga uma a le Mafutaga. Peitai o le tausaga nei na a'e ai loa se finagalo, ua tatau loa ona amata leni faamoemoe. Ma o le ala lea ua tula'i ai loa le Mafutaga Aoa Tina e faataunuu ana i'ugafono. O le tulaga maota lea sa i ai le Fale Mafutaga tuai, lea ua tuu i lalo lena fale tuai ua tele tausaga o lana tautua, a e fausia ai le maota fou ua amataina nei. O le konekarate a le Blue Bird Lumber/Ah Liki Construction, a le afioga Faamausili Tuiaopo Andrew Ah Liki, o loo nafa ma le faatinoina o le galuega, ma e i ai le faamoemoe pe a tusa ma le finagalo o le Atua, e tatau ona aulia atu le Fono Tele 2025 ua mae'a leni galuega tele.

O le Komiti Faafae o leni galuega o loo aofia ai le Laulau a le Mafutaga Tina: Taitaifono - Faafetai K. Fuafiva (Falealili Safata Siumu), Sui Taitaifono - Rosa Tafaoialii (Amerika), Failautusi- Aiga Peseta (Apia). E faapea foi ona lagolagosua le Laulau a le Komiti Faletua Au Toeaina, Taitaifono - Tualogomai Gray (Vitoria), Failautusi - Susana T. Iosia (Falealili Safata Siumu), Teutupe - Valasi A. Patea (Vaimauga). O le faatupeina o leni galuega e tofu sao uma i ai le nofo a Mafutaga mai Matagaluega uma e 21 a le Ekalesia ua i ai nei, i Samoa ma atunuu mamao.

Ia manuia le feagai ai ma le galuega tele, ma ia saga viia ai le suafa o Iesu Keriso le Ao o le Ekalesia e faavavau.

EFKS MALANA GALUEGA FAAMISIONARE

VAAIGAI LE LUMANA'I I LE GALUEGA FAAMISIONARE A LE EFKS

*(O le Pepa na saunia mo le Mafutaga Matagaluega Faleata 18 Iulai 2024, e le susuga
Dr. Alesana F. Palaamo FS, Faiva Alofilima Mataupu Silisili – Practical Theology MTC)*

Faatomuaga

*¹⁸ Ona maliu ane ai lea o Iesu, ua fetalai atu ia te i latou, “Ua tuuina mai ia te a’u le **pule uma lava i le lagi ma le lalolagi.** ¹⁹ O lenei, ia outou **o atu** e fai **nuu uma lava ma soo,** ma **papatiso atu** ia te i latou i le **suafa o le Tamā, ma le Atalii, ma le Agaga Paia;** ²⁰ ia outou **a’oa’o atu** ia te i latou ia **tausi i mea uma ua ou fai atu ai** ia te outou; faauta foi, **ou te ia te outou i aso uma lava,** e oo lava i le gataaga o le lalolagi.” Mataio 28:18-20.*

O le faamoemoe o lenei Pepa ina ia tuu atu nisi o a’oa’oga ma manatu ma mafaufauga, aga’i i le Galuega Faa-Misionare a le EFKS, o se vaaiga i le lumana’i. E talitonu o lea ua faataatia se vaaiga agai i le Galuega Faa-Misionare a le EFKS i le taimi ua tuana’i, e pei ona tapenaina e le susuga i le Faafeagaiga Nuuasala Siaosi. E faapena foi ona folasia le Galuega Faa-Misionare a le EFKS i le taimi nei, e pei ona saunoa i ai le susuga Faafeagaiga Siaosi Mataia FS. O lea foi ua mautū atu se sao o Tina i le Galuega Faa-Misionare a le EFKS, e pei ona saunoa i ai le Faletua Penisione o Lila Viliamu. E faapena foi ma se sao o Tagata Lotu i le Galuega Faa-Misionare a le EFKS, na fofogaina e le Susuga ia Tapu Gabriel. Mo lenei taumafaiga ma se sao i le tatou Mafutaga, e amata atu i fuaiupu e pei ona tomua ai lenei Pepa, i le valaauina o le Kerisiano moni e fai nuu ma soo.

1.0 Valaauina mo le Galuega Tala’i – The Great Commission

O fuaiupu nei ua talitonuina e le lalolagi Kerisiano, o le fetalaiga tuusa’o a le tatou Alii Faaola o Iesu Keriso, sa faatonuina ai le au soo mo le galuega tala’i. Ina ua fa’aali mai Iesu i lona Toe Tu manumalo mai le oti, o lea e i ai le fuaitau lea e pei ona ua tuuina atu. O lenei valaau mo le au soo i le senituri muamua mo le galuega tala’i – the Great Commisiion (i lona faa-Peretania), e oo mai lava i le seneturi 21 o lenei meleniuma, o loo talafeagai pea mo le valaauina o tatou. O le tatou valaauina mo le galuega tala’i, e mafai ona faapea, o le tatou valaauina lava lea mo le Galuega Faa-Misionare a le EFKS. O vaega taua o ia fuaiupu e pei ona **valivali uliuli ma vase** atu i luga, o le a faamatalaina atu ma lona fesootaiga ma le Galuega Faa-Misionare a le EFKS:

- 1.1 **pule uma lava i le lagi ma le lalolagi:** o le pule aoao o le Keriso Toe Tu.
- 1.2 **o atu:** o se upu galue, ia fai le galuega, ‘aua le nofoa’i, a e tula’i ma galue.
- 1.3 **nuu uma lava ma soo:** silasila toto’a i foliga o Aulotu EFKS i le 2004, 2014, 2024, 2034?, 2044? Ua tele suiga i lenei vaitau i lo tatou siosiomaga.
- 1.4 **papatiso atu:** Sakarameta a le EFKS, faatino talitonuga e pei ona a’oa’o e Iesu.
- 1.5 **suafa o le Tama, ma le Atalii, ma le Agaga Paia:** e lē o faamauina le Atua, atonu ona e tutusa uma i le Tolu Tasi Paia: o le Atua le Tama, le Alo, le Agaga Paia.
- 1.6 **a’oa’o atu:** faatāua A’oa’oga Kerisiano a le EFKS i Lana galuega Faa-Misionare.
- 1.7 **tausi i mea uma ua ou fai atu ai:** A’oa’oga uma a lo tatou Alii faatasi ma ana poloaiga o loo faamauina Mataio 22:37-39 – *E te alofa atu i le Alii lou Atua ma lou loto atoa, ma lou agaga atoa, ma lou manatu atoa...E te alofa atu i le lua te tuaoi, ia pei o oe lava ia te oe.*
- 1.8 **ou te ia te outou i aso uma lava:** e faatasi pea Keriso Toe Tu ma tatou uma, i le tatou Galuega Faa-Misionare.

E pei ona faatāuaina le a’oa’o atu, o lea ua taumafai lenei Pepa e tuuina atu nisi o su’esu’ega ma mafauauga aga’i i A’oa’oga Kerisiano, se vaega tāua o le tatou valaauina mo le Galuega Faa-Misionare a le EFKS, nei ma a taeao.

2.0 Mafauauga Tuuavanoa (*Critical Openness*)

O lenei su’esu’ega (Hull, 1981) ma manatu ua tula’i mai, sa feagai lava ma le Polofesa o John Hull, faatasi ai ma suesuega i Lotu Kerisiano i le Faalapotopotoga o Lotu i Peretania. O nei mafauauga e faatauaina ai le tuuavanoa i le tagata lava ia, na te sailia ai lona lava faatuatuaga ia Keriso, e ala mai i le faaleoina o lona lava manatu. O le avanoa lea o le tagata ma lona tuuavanoa, ina ia a’oa’oina ai le tagata i A’oa’oga Kerisiano, e mafauaui loloto ai, ma sailiili mai ai ni manatu tāua mo ia lava. E ui lava i lea tuuavanoa, a e le mafai ona aveesea mai ai le talitonuga faavae faaKerisiano ua tatou masani ai. E lu’itauina ai foi le faagasologa o A’oa’oga Kerisiano ua tatou masani ai, i le tuuavanoa i le tagata na te filifili ai ni mea tāua (i lona lava manatu), e aogā mo ia ma le tulaga ua i ai lona tuputupu a’e faalefaatuatua.

O le fesili e ao ona tatou mafauaui loloto i ai:

1. O le faamoemoe ea o le tatou faatuatuaga Kerisiano (Christian faith), o le taumafai lea e faakerisianoina i latou o loo gasolo mai i le augatupulaga ma lea augatupulaga, i mea sa a’oa’oina ai foi i tatou?
2. Po o le fesili e faapea foi, ia tuu atu i augatupulaga o loo gasolo mai, lo tatou faatuatuaga Kerisiano e pei o se afffi, o loo taatia ai se mataupu silisili?

I le fesili muamua, e manatu John Hull i ana su’esu’ega, afai ua tatou manatu ina ia fa’auau pea (*duplicate*) o tatou faatuatuaga Kerisiano i augatupulaga o loo gasolo mai, o lona uiga, ua tatou taotaomia ai nai fanau, i lo latou tuputupu a’e faalefaatuatua. Ua tatou aveesea lo latou lava tuuavanoa, e saili ai e i latou lo latou lava faatuatuaga.

I le fesili e lua, e manatu John Hull, e lē talafeagai lo tatou tuuina o le Tala Lelei ia Keriso i totonu o se pusa po o se afffi, ona avatu lea o lea pusa i augatupulaga o loo fai mai. I lona manatu, auā foi o le lalolagi e fesuisuia’i, ma tatou te lē tumau lava i se siosiomaga e tasi. E tele suiga fou o le olaga, ma e ao foi ona fetau i A’oa’oga Kerisiano i lenei vaitau, ma suiga fou o le lalolagi. Afai la ua tatou tuuina le mataupu silisili, po o le tatou faatuatuaga Kerisiano i totonu o se pusa, a o se pusa foi ua lē talafeagai ma suiga ua i ai nei le lalolagi i lea taimi.

2.1 O Eseelega o Aoaoga Kerisiano a le EFKS i le taimi nei ma Mafauauga Tuuavanoa (*Critical Openness*)

O le faatinoga o a’oa’oga Kerisiano i le taimi nei i le EFKS, ua fetau tonu ma se tasi o auaunaga e pei ona ta’ua e Jack Seymour, **O Faatonuga o A’oa’oga Faalelotu *Religious Instruction Model*** (Astley, Francis & Crowder, 1996). O le a’oa’oina o le fanau (faapea soo se vaega o le aulotu), e faamamafa ai le malamalama i tala o le Tusi Paia, o talitonuga ma faatuatuaga o le Ekalesia, faapea tu ma aga o le Kerisiano moni. E tāua le faia’oga i lea faatinoga, po o le faapea - *teacher-centered learning*. E a’oa’o mai le faia’oga, a e matau atu e le fanau (po o i latou uma o loo a’oa’oina). O le faaso’o atu o le faiaoga i le fanau, ua fa’aaogaina ai a’oa’oga aloaia, po o le *formal classroom teachings*. O le sailia foi po o le malamalama lelei le fanau, ua faia lea e ala i su’ega.

A silasila foi i le faatinoga o Aoga Aso Sa ma Aualavou i le Ekalesia (EFKS), o loo atagia ai faatinoga uma e pei ona ta’ua. Ua tele ina tauloto e le fanau fuaiupu mai le Tusi Paia, ma ua lava ma totoe lo latou iloa o tala eseese o loo i ai. O loo o gatasi lava faagasologa o A’oa’oga Kerisiano ma

Faatonuga o A'oa'oga Faalelotu (Religious Instruction Model) mo aulotu taitasi o le Ekalesia (EFKS) e le gata iinei i Samoa, a e faapea foi i aulotu i fafo.

A faatusatusa i **Mafaufauga Tuuavanoa (Critical Openness)** atonu o se eseese tele lea, o le faatinoga e pei ona i ai nei. Pei e foliga mai o le tele o mea ua a'oa'oina ai le fanau i totonu o le EFKS, e faaitiitia ai so latou lava manatu i a'oa'oga e pei ona maua mai i a'oga o aso fai soo, e pei o a'oga a le malo. Atonu ua tau leai se mafaufau tuuavanoa, a e ua na o le faaso'atu lava o le Faia'oga Aso Sa, a e maitau mai e le fanau. O le faamamafa foi e pei ona i ai nei, ia malamalama lelei le fanau i tala o le Tusi Paia, e lē o se mea leaga. A o fesoootaiga o tala o le Tusi Paia, ma faafitauli o loo feagai ma le tamaitiiti, atonu e fesoasoani ai le metotia lenei, o le mafaufau tuuavanoa i lona faatinoina. O lona uiga i le faatinoina o **Mafaufauga Tuuavanoa**, o le auga ma le faamoemoe o lē e faatautaia a'oa'oga, ia tapu'eina pea le faatuatuaga Kerisiano, auā o se faamoemoe e tupu ma ola lelei pe a sa'o lona atina'eina.

2.2 O Faatusatusaga o Aoaoga Kerisiano EFKS ma Mafaufauga Tuuavanoa

(1) E tusa ai ma a'oa'oga o Mafaufauga Tuuavanoa, ua atagia mai ai le lē faamamafaina o le a'o taulotoina o le Tusi Paia e le fanau. O le a'o taulotoina o le Tusi Paia e le fanau, e manatu le Mafaufauga Tuuavanoa, e lē iloa e le tamaitiiti le uiga moni o le mea o loo taulotoina. O le mea sili ona tāua, o le iloa o le uiga moni o le upu mai le Tusi Paia o loo taulotoina, ma lona fa'aaogaina i aso uma.

(2) O le tasi o a'oa'oga o Mafaufauga Tuuavanoa, o le lē faamamafaina lea po o le ā le loloto o le iloa o se tasi i le Tusi Paia i totonu o Aoga Aso Sa ma Autalavou. O le mea aupito sili ona tāua, o le taitaiina ma atina'eina o fanau i le ola faaleagaga. Afai e iloa ma malamalama i le ola faaleagaga, o iina tonu o le a'oa'oina ai ma tuuina ai le avanoa, mo faatalatalanoaga, ma fefaaso'iga o latou iloa ma manatu i suiga fou o lenei olaga.

(3) Mo le faatupuina pea o le ola faatuatua, e manaomia ai le felagolagomai ma le galulue faatasi i taimi o a'oa'oga. O le faatauina lea o Mafaufauga Tuuavanoa, ina ia faamalosi ai le tatalaina o finagalo fa'aalia. E faalateleina ai pea le malamalama i le Tusi Paia, ina ia 'aua le mafuli i se manatu e tasi se faaiuga. E le tatau ona faamamafa a'oa'oga e faiaoga, i fanau laiti i uiga loloto o le Tusi Paia, a e mafai ona fa'aaogaina faataitaiga i le olaga i aso nei, e a'oa'oina ai le fanau.

(4) O le tasi o a'oa'oga mai **Mafaufauga Tuuavanoa**, e lē faamamafaina ai sailiiliga o le malamalama a fanau e ala i su'ega, ma le faatulagaina o i latou e fua ia latou taumafaiga. E pei ona i ai a'oga o loo a'o'oga ai fanau i aso o le vaiaso. I le **Mafaufauga Tuuavanoa**, e lē talafeagai le tuueseeseina o le fanau, po o ai ua tele le malamalama i le Tusi Paia a o ai e vaivai. O le auga ma le faamoemoe o Aoaoga Kerisiano e tusa ma **Mafaufauga Tuuavanoa**, o le tapu'eina o le ola faaleagaga, a e lē o le faavasegaina o le fanau e tusa ai ma lo latou malamalamaga.

3.0 A'oa'oga e Faatāuina le Auai o le Tagata (Participatory Learning Theory)

O lenei suesuega (Hermans, 2003) o loo faamamafaina le auai (*participate*) o le tagata o loo a'oa'oina. O le auga o lea manatu, e faavae lea i ni eseese o mafuaaga ua ala ai ona auai tagata i Aoaoga Kerisiano. Ua mafai ona vaevaeina mafuaaga e faapea: o le auai 'tau ina faataunuu' (*passive participation*), ma le 'auai ona o se naunautai moni ina ia a'oa'oina' (*active participation*).

E pei ona maua mai i lenei suesuega, o se tasi auala ua mafai ona faafoia ai le auai o le tagata i Aoaoga Kerisiano a e lē o loto i ai, o le fa'aaogaina lea o se metotia ua faatusa i se **fata fetāfa'i**

fata faalagolago (*scaffolding*). O le manatu o lea faatusa, ina ia a’oa’oina le tagata i A’oa’oga Kerisiano e pei foi ona fausia ai o se fale, i le fa’aaogaina o fata fetafa’i/faalagolago. O fata e mafai ona feoa’i solo ai tagata fau fale ma faatinoina o a latou tiute ma galuega. O fata foi e faatuina i le amataga o le galuega, a e mafai ona toe tatalaina, ma e tatau lava ona toe tatala i le taimi ua mae’a ai le faamoemoe. E lē o se mea tumau, ma afai ua mae’a se faamoemoe, ma ua tatala i lalo, ona ave lea e fa’aaoga mo se isi galuega o loo fuafuaina. O se faatusa lea ua mafai ona fa’aaogaina, ina ia a’oa’oina ai le tagata i Aoaoga Kerisiano.

A oo ina amata le galuega o le a’oa’oina o le tagata i Aoaoga Kerisiano, ona faatuina lea o se fata faalagolago. O a’oa’oga, fautuaga ma faatonuga, o itutino ia e pei ona i ai le faatusa i le fata faalagolago. Ia lava ma totoe, ina ia mafai ona aveesea lenei fata, a e lē afaina lē ua a’oa’oina. O le aogā o lenei faatusa, ina ia tuuavanoa atu i lē ua a’oa’oina, na te fa’aaogaina mea tāua ua maua mai aoaoga, i lona lava faitalia, ia mafai ona tulai pea i se taimi ua aveese ai o lenei fata. E lē gata i lea, a e faamalosia ai foi lē ua aoaoina, na te fa’aaogaina ana ia lava taleni ma agavaa, o ni meaalofofa sa taotaomia ma e le’i fa’aaogaina. I le fa’aaogaina o lenei faatinoga, o le faamoemoe lava ina ia naunau ai le tagata (*active participation*) i A’oa’oga Kerisiano, ina ia faamausalī ai lona ola faaleagaga.

4.0 Galuega Faa-Misionare a le EFKS, Tausaga 2004 – 2014 – 2024; 2034 [?] – 2044 [?]

I se tasi o tusitusiga mai le Ekalesia Porotesano i Holani (Plaisier & Koffeman, 2014), o loo talanoa mai ai i ni taiala e 30, e fesoasoani i Galuega Faa-Misionare o Ekalesia Kerisiano, faapitoaugafa i Lotu Porotesano. O se mau tauave o lenei tusitusiga e faapea ai, ***The Church does not do mission, the Church is mission.*** E tau faapena se lagona mo le tatou Galuega Faa-Misionare; o le EFKS, o le **Misionare lava lea mo le Atua.** E tatau lava ona atagia i a tatou galuega e faia nei, mo a taeao, o tatou o Misionare. Tatou te o e folafola le Tala Lelei, ma faia vaega uma e pei ona faamatalaina i le Mataio 28:18-20, ***The Great Commission.*** I le ma lenei, ia fai ni galuega fesoasoani nei, mo le lumanai o tagata uma o le EFKS, faapea ma tagata lautele o Samoa.

4.1 Faatuina se Galuega Fesoasoani a le EFKS – ‘*EFKS Counselling & Social Services*’

O le Aso Tofi, 29 Ianuari 2015, sa faavaeina ai le EFKS NZ Trust i Niu Sila, auā ni galuega fesoasoani a le Ekalesia mo le toatele o le Ekalesia o loo galulue ma nonofo i Niu Sila (Tauafiafi, 2015). **A o le faatatau ma le tuualalo o lenei Pepa, ina ia faavaeina se Galuega Fesoasoani a le EFKS iinei lava i Samoa, e tali ai i faafitauli ma le tele o suiga ma lu’itau ua i ai nei Samoa (Pala’amo, 2019).** O se faataitaiga o se Galuega fesoasoani e pei o lenei – EFKS Counselling and Social Services.

I se sailiga sa ou faia i le tausaga 2015, sa maua mai ai ni faamaumauga e faasino i A’oa’o ua i’u mai le Kolisi Faafaifeau Malua (1995 – 2015), faatasi ma le Aufaigaluega fa’aaogaina mo ia tausaga:

	<u><i>Aulotu i le Tausaga 2015</i></u>		
	<u><i>Aulotu</i></u>	<u><i>Matagaluega</i></u>	<u><i>Pulega</i></u>
Savaii	59	2	7
Upolu	142	7	19
Niu Sila	70	3	8
Ausetalia	66	4	10
Amerika	24	2	6
O Isi	<u>2</u>	<u>0</u>	<u>0</u>
AOFAI	<u>363</u>	<u>18</u>	<u>50</u>

O ni faatupu manatu mai lea sailiga:

- (i) Ua na o se ata faata'ita'i i tausaga ua tuuina atu e lenei Pepa, ona o loo sailia pea fuainumera mai tausaga i tala atu ma tala mai o tausaga ia 1994 – 2015.
- (ii) Mo le vaitau lea ua faailoa atu, e 447 A'oa'o na i'u mai Malua.
- (iii) E oo mai i le 2015, e 129 i latou e leai ni galuega o le Ekalesia o galulue ai.

O loo i ai nisi o faalapotopotoga tuma'oti e mafai ona fesoota'i ma faipa'aga ma le EFKS, e fa'aaogaina ai nisi o le Aufaigaluega a le Atua o le tatou Ekalesia. O galuega *counselling* po o faatalanoaga ma fetufaa'iga, faapea ma ni *social services* e galulue ai ma ia faalapotopotoga. O social services e aofia ai Tamaiti a'oga ma le Tupulaga talavou, pepa malaga mo atunuu i fafo (immigration services), fualaau faasaina ma le 'ava malos (drugs and alcohol), sauaga i totonu o aiga.

[Silasila ane i ata o loo faailoa atu ai se tasi o faalapotopotoga - Soul Talk Samoa Trust.
<http://soultalksamoa.ws/>]

O ni Galuega Fesoasoani a le EFKS e pei ona taumafai i ai lenei Pepa, ina ia atagia ai le alofa mutimutivale, ma le loto alofa o le Atua, i a tatou faatinoga. Ia mautinoa ai le *compassion* po o le loto alofa ma le alofa mutimutivale e sau mai le ogatotonu o le tagata, mai lona loto, i tatou galuega uma. E le gata mo i latou o loo feagai ma lu'itau o lenei olaga, a e faapea foi le fa'aaogaina o le Aufaigaluega a le Atua o loo avanoa i le taimi nei.

Upu Faai'u

E leai se manatu o lenei Pepa, e faaleaogaina galuega o galulue ai le au uso faifeau, faapea le aufaigaluega o Aoaoga Kerisiano o le Ekalesia. A o le auga o lenei faamoemoe, ina ia fesoasoani lenei Pepa aga'i i ni vaega e ono aga'i ai se faamamafa, o le Galuega Faa-Misionare o le EFKS i le lumana'i. E eseese lava siosiomaga o loo galulue ai nisi aulotu o le tatou Ekalesia, e le gata i Samoa a e faapea foi i atunuu i fafo. Ua sui foi lenei vaitau i le galuega Faafaifeau, aemaise lava pe a taga'i i suiga fou, ma le alualu i luma o le tekenolosi i nei i Samoa ma atunuu i fafo.

O nei su'esu'ega mai nisi ua faapitoa lo latou tomai aga'i i A'oa'oga Kerisiano, lea ua tuuina atu i lenei Mafutaga. A o lona aoga, ma le fa'aaogaina i aulotu taitasi o le Ekalesia (pe afai e talafeagai), o loo i aao lava o le paia ma le mamalu o Susuga i Toeaina ma Faafeagaiga ma Faletua, ma aulotu taitasi. O le tatou faamoemoe lava e tasi, ina ia aoga ma talafeagai pea le galuega Faa-Misionare o le EFKS nei, mo a taeao, e lu'itauina ma faafouina ai le tagata faatuatua mo le Malo o le Atua.

Ia manuia tele le Mafutaga a le Matagaluega Faleata o lenei tausaga. Faafetai.

Saunia Susuga Dr. Alesana F. Palaamo FS
Faiva Alofilima Mataupu Silisili - Practical Theology
Faifeau Faia'oga, Kolisi Faafaifeau Malua.

O LE PEROFETA MULIMULI

(O se tala faafagogo ua faaSamoaia mai le tusi, 'The Last Oracle', tusia e James Rollins)

“Ua leiloloa uma isi.”

Na punou teisi ifo Karai ma tago atu i le uili sakara sa vane i le fola. Na taatia ai le omofalosi i lona ogatotonu. Toe itiiti lava a faitau e Elisapeta le mafaufau o Karai. Afai e tāua le omofalosi, lona uiga e sili atu ona faaluaina le tāua o le mea o loo i lona ogatotonu. Na faapuiti mata o le tamaloa a o ia laa atu i le maa. Sa na ona latou tepa faalē ano i ai.

“Na nanā e lou tamā le ulupoo i totonu o le maa i le fale mataaga. Atonu e i ai se mafuaaga.”

Na a'e atu Karai i luga o le omofalosi.

“Faaeteete,” na ‘e’ē ai Elisapeta, i lona fefe ne’i faaleagaina le vaega o le tala faasolopito. Na ia faataamilo i le maa ma iloa atu i le ta’ele o loo tusia ai foi upu i gagana e tolu: Harapana, Sanesekeriti, ma le faa Eleni.

Na ia pu’e isi ana ata.

Na faapaleni Karai i luga o le omofalosi, ma faasusulu atu lana molī i totonu o le pu ma ati atu i le fatu o loo gaogao.

“O le a se mea o e iloa atu?” na fesili atu ai Elisapeta.

“O le auro... i ona foliga o aeto e lua.”

Na pei e puni le mānava a Elisapeta. “O faafesagai le tasi ma le isi?”

Na tepa ane i tua Karai ia te ia. “Ioe.”

“O se isi meafaitino leiloa mai Telefā, o aeto a Seu. E tusa ma tala tuu, na tuuina atu le pealua lena i itu faafeagai mai lona tau’au ina ia o e saili ia maua tonu le ogatotonugalemū o le lalolagi. Na la’ua o atu ma feto’ai ai i Telefā, ma ua faailoga ai o le ogatotonu lena o le lalolagi.”

“E mautinoa sa maua foi e lou tamā.” Na tago atu Karai i totonu. “Atonu e i ai se mafuaaga o loo natia ai iinei, le mafuaaga foi lena e tasi na natia ai e lou tamā le ulupoo i le omofalosi i le falemataaga.”

A o ia tau fālō solo, na faavāvā atu Elisapeta i autafa o le maa, o fa’auau le faitau faaliliuga o laina e tolu.

“Ou te mafai ona tago atu i ai...” o Karai lea.

Na memumemu e Elisapeta upu o tusia ai, ao ia faasosolo ai ona tamailima i mataitusi taitasi. “O le Matape’ape’a ma le upu leaga e aumaia le faafanoga i tagata uma.”

Na tu faafuase’i Elisapeta.

Leai! Auoi, e leai!

“Lea ua ou maua,” na fai mai ai Karai a o ia pa’i atu i aeto auro.

Na tu sa’o Elisapeta. “Aua!”

O le te’i o Karai na ia se’e ai.

O se leo malosi na patatū mai i totonu o le maa, sosoo mai ai ma le leotele o se ta’e i lalo o vae. Na soso’o mai ai ma se gogolo na sau mai le pito mamao o le ana, na faatupututeleina, sa pei o se nofoaafi o loo aga’i mai ia i latou.

Na meia faasasa’o tagata uma e to le mānava, ona faasino atu lea e Karai lona lima i le fasitepu.

“Fafō tagata uma!” na ia ‘e’ē atu ai.

A ua tuai tele lava.

Mai le avanoa o le vai, na pa pupuna a’e ai le vai i le malosi i le paoa pei o se faaga’au afi – i ona galugalu e ta’i lua futu le mafiafia. Na mafitifiti solo mea na mavaevae ma salalau i le puipui, na taia ai i latou uma ma toulou i lalo i le malosi o lona tafe.

Na lavelavea solo Elisapeta i le isi vaega a o vave faatumulia le potu i le vai malulu. Na tago atu Karai i lona tulilima toso mai ma tulei atu agai i le sitepu.

“O se mailei...” Na ia tale i lona te’i. “O le ki omia! O lo’u tamā...na taumafai e lapata’i mai tatou...”

Na valaau mai Karai, “Fafō! Fafō nei lava!”

Na a’e Elisapeta i ulua’i fasitepu i ona lima ma vae. O ona tua, na sii a’e ai e Karai ia Luka mai le vai ma tulei atu aga’i i sitepu. Ua oo le maualuga o le vai i ona ogavae ma siisii vave pea. Na i lalo pea Karai, faagatasi i le avanoa o le auala o tau saili le tama’i ana.

Na iloa e Elisapeta le mafuaaga.

O fea o i ai Rosauero?

Ua leiloa atu e Karai o ia. Sa aupito latalata i le vai ina ua pa. O le vai sa pei o se vai taavilivili i totonu o le ana ma sa suluia i le moliuila. Na te le’i mafai ona vaai atu i lalo. Ua oo atu le vai i lona puimanava i le taimi nei. Ui i lea, e tatau lava ona mafai e Rosauero ona tu i ona vae, ae tusa foi pe na taia ma pa’u i lalo, e mafai lava e lona tino ona faailoa mai le mea o i ai.

Se’i vaganā...

Na faasaga atu Karai ia Luka ma aapa atu lona lima. “Aumai lau pelu!”

Na emo ane le siliva o le lau o le agaese i lima o le Kipisi. Na ia tuu atu le 'au i le alofilima o Karai. Na tuu atu foi e Karai le moli uila ia te ia. "Tu'u ma taofi le susulu i lalo o le vai!" na ia faatonu atu ai ma puna atu i le vai a o faatuputupulaia.

Na maua o ia e le tafega ma fetogia'i solo i le potu. Na te le'i tetee atu i ai. Na ia avea le malosi o le tafe e avea o ia i le isi itu o le ana. Na ia iloa ina ua taunuu i ai, ina ua lagona le malosi ese o le vai o pupuna mai lalo. Na ia feliiua'i ma fea'a aga'i i le puipui o le isi itu.

Pe o malamalama pe leai, e tasi le mea o loo ia taofia Rosauero i lalo ifo i le vai.

O le malosi o le omiga.

Na puna atu Karai i le itu o le vai na tafia ese atu i fafo. I le ataata mai o le moli uila, na ia iloa atu ai foliga o se tagata o loo gaoioi i le tauiviga i le pu e tafe ese ai le vai. O Rosauero na mitiia aga'i i le avanoa, o le tasi ona lima ua goto atu i lona fa'a'i. Na faalogo Karai i tagata e malelemo, na miti'ia faatasi ma le vai pe a faatafe ese. O le malosi lea e i ai iinei e faaselau atu lona malosi. Na tago atu Karai i le isi lima o Rosauero o avanoa ma toso atu ai o ia i le tamaitai. Na ia faamaopo atu ona vae i itu uma o le alavai. Na autilo ifo le tamaitai ia te ia. E ui ina tau nenefu le malamalama, a e na ia iloa manino le fefe i ona foliga.

Na sasau atu e Karai le pelu. Ua uma ona malemo muamua le isi ana uo- na te le'i manao e toe malemo se isi. Na sala atu le lau o le pelu i nonoa o le ato faafafa a Rosauero. O le afa o le ato na mitiia atu i le pu, na taofia ai o ia. Ina ua motusia le ato, na togi ese e Karai le naifi, afisi mai le tamaitai i lona puimanava, ma aau uunai atu o ia i ona vae. Na taofia pea Rosauero mo sina taimi. Ona sosolo atili atu lea o le ato faafafa i le pu, ma faaitiitia ai le tafe o le vai, ma faigofie ai ia Karai ona toso ese i la'ua. Na la'ua faapa'u'u atu i tua, o Rosauero o loo fusi e Karai i ona lima. Na tuu atu i le tafe taavili o le vai, la te faatafefe atu ai i le sitepu ma le malamalama.

Na si'isi'i le vai na oo i le toe o le futu pa'i atu i le taualuga.

Na lagonaina le pa'o mai o maa ua oloia. Na faafuase'i ona taia malosi le tafe o le vai, a o solov'i ifo puipui o le ana i ona tua. O Karai na u'una'i atu i luma, na ia a'a ese atu le pito i lalo ma aau atu i le auala sitepu ua faatumulia.

Na ia auselasela atu, ma ea a'e i lima o Luka. Na tago atu Luka fesoasoani e toso a'e Karai ma Rosauero i luga o sitepu. O si tamaitai na tale tau laoa i le malemo. Na masaa mai vai mai ona laugutu, a o ia to lana manava i le va. O se tasi o ana manava na ia feula atu ai ma se upu masoa faaSepania, e mafai ona mu ai fulufulu o taliga o Koualasaki.

O latou tua atu, na faatumulia ai le potu i le vai ua oo i le taualuga, ma faafuasei ai ona taavili atu le vai ia i latou.

"O le taimi tatou te o ai," na fai atu ai Karai.

Na ia toso a'e Rosauero i luga ma talo atu ia Elisapeta ma Luka o i luma atu. O Rosauero na tootuli i le vaivai, a e ona o le vai na malosi a'e i o latou mulivae, na ia tula'i ai faasa'osa'o lelei ma tamo'e loa. Ui i lea, na ia tautosolona lima agavale, na gase i le mimitiina e le vai.

Na latou sosola agai i luga, a o tuli atu e le galugalu siisii a'e o le vai o tatafe.

Ina ua taunuu i le tumutumu, na faase'e i tua Elisapeta i fafo i le matala, taupe i ona lima, ona faapa'u ifo lea i le fola i lalo.

"Alu!" na valaau atu Karai ia Luka ina ua faatautū.

Na usitai Luka ma lilo atu ai.

Na fesoasoani atu Karai ia Rosauero e ui atu i le faitotoa maa uliuli. Na ia tautau mai lona lima o lelei, ona faapa'u ifo lea. Na mulimuli atu Karai ia te ia a o lolofi atu le vai faatumulia ai le sitepu mulimuli ma lilofia uma ai o ia i le galu.

Na ia oso ese, o ona tamatamailima na mamulu i sina sekone a e le'i taia le vai i le faitoto'a ma tapuni patatū ai. Na ia tuvae ma autilo a'e i luga. O le faitotoa maamora na tipia i se tulimanu, lona uiga e tasi le itu e taavili i ai. Ua tapuni taofia nei e le oomi malosi a le vai.

Faamau e ia lava.

O lona liliu na ia lagona atu ai se gogolo mai le vanu. Na feemo mai uila. O vai papa'e taavili na tafe atu i le fola o le vanu. O le vanu foi sa tafe, peitai o se tafe faanatura – a e le'i o le tuatuagia o le soona fesasia'i solo o lima o Karai.

Na ia faatau pupula atu i le tele o le vai o tafe atu i le vanu.

E le tioa a fausia nei fale i totonu o papa.

Na maitau atu e Karai se isi mea.

Sa faapena foi ona iloa e Luka, ma ia musumusu atu ai, "O fea uma o i ai tagata?"

E pei lava sa lagona atu e Matesone le fesili, ona ia setusetu mai lea i autafa o le faitotoa, o loo ia

faalagolago i lona tootoo. Sa lilo o ia i le vaai atu i fafo i le faapaologa. Atonu sa latou tulimata'i le tafe a le vai faatasi ma isi.

“Faafetai le Atua e,” o le polofesa lea. “Ua leva tele ona outou i lalo iina. O le a se mea na outou mauaina?”

Na laa mai i luma Elisapeta ma lona fiafia. “O le tali i mea uma! Sa matua'i matagofie.”

“Oi, se tala sa'o?”

O tua atu o Matesone, na feosofi vave mai ai nisi tagata.

O nisi foi na lolofi mai i faitotoa o potu sa i itu e lua. Na laei uliuli uma, sa tofu ma le auupega fasitagata ua sauni i o latou tau'au.

O fitafita Rusia.

“O le a e ta'ua uma mai ia te a'u,” na fai atu ai Matesone. “Ona sa musu lou tamā e ta'u mai.”

Na toso mai i luma Koualasaki mai le faitotoa, o ona lima sa i luga o lona ulu. O lona mata taumatau ua ta'e, ma sa tafe ifo ai le toto i ona foliga. Na faamalosi o ia e fitafita ina ia tootuli.

“Na latou fasiotia Api,” na ia tomumu ane ai. “Na latou fanaina pei se ta'ifau.”

Na faamimigi Matesone. “A e aiseā e lē fasia ai? O ia o se akuta. E sili atu ai le faiga o taifau ia i latou i Initia.”

Na faasolosolo tutū faataali'oli'o fitafita i o latou autafa.

Na faatau sisila atu Elisapeta i le polofesa, ua tumu i lona ita ma le te'i, ua na lē iloa se tala a fai atu. Ui i lea, na oso a'e le afi o lona ita tele i ana upu, i lona iloa ua mata'utia le loloto o le faalataina ua faia iinei. “O oe la lea! O oe na faalataina lo'u tamā!”

“Sa leai se isi mea ou te mafaia, Elisapeta. Na latalata tele o ia i le sailiga o le mea moni.”

Na matuā maluluina Karai. Na ia malamalama lelei i le taaloga lea na faia iinei. O Matesone na totogi ina ia mata'itū ma vaavaai i saililiga a Fomai Poleki, ina ia maua faamatalaga e ta'u ma fafaga atu i ona ta'ita'i...peitai ina ua latalata tele atu le tamā o Elisapeta, ona tataua loa lea ona aveese o ia mai le taaloga.

O ai lea sa i tua o nei mea uma?

Mata sa maitauina e Matesone le inoino ma le ita faa'aisa sa i totonu o mata o Karai. Na ia laa teisi ese, e ui ina sa leai se mea tele a Karai e mafai ona fai. Na talo atu le tootoo o Matesone. “Ta'ita'i Piesa, e foliga mai mo le taimi nei, o oe ma isi o lau vaega, o le a manaomia le tuu pea ia

ola mo le taimi nei. A e lē faapena le alii lapo'a lenei.”

Na ia tusi atu lona tootoo ia Koualasaki.

“Fasioti o ia.”

Na pū pū tetele mata o Koualasaki.

Na oso atu Karai, peitai e tolu au o fana na taia ai lona fatafata.

Na faataiō atu Elisapeta, “Leai, faamolemole, Eiteni, leai! Ou te ole atu ia te oe!”

Na maua atu e Karai le faasi'usi'uga o lana valaau augani, e faapena foi ia Matesone.

Na vaavaai atu le polofesa i le va o Elisapeta ma Koualasaki – ona faasesepa lea i luga o ona mata. “Ua lelei. Na pau lava le mafuaaga, ona o la'u aitalafu i lou tamā. A o le taimi lava e aliali mai ai se faafitauli i soo se isi o outou, ona amata loa lea ona matou tafanaina.”

Na tilotilo atu Matesone ia Karai. “Sa e mana'o e fia iloa le mea na alu i ai Atipale?” Na ia liliu ma savali ese. “E tatau ona e faaeteete i mea e te mo'omo'o i ai.”

7 Setema, 5.05 taeao

Atumauga Urale i Saute

Na aloalo atu e Monike le latou vaalaau i taufusi i le malosi e gata ai i lona lima e tasi. E lē tatau lava ona latou nofo'i. Na alu le po o tuliloa i latou. Na faataatia ma 'u'u lelei le laau na fai ma foe i lona lima sa leaga, ona ia tulei lea ma uunai o ia i lona lima lelei. Na alu atu lemu le vaalaau i le laufanua ua lilofia i le vai.

A o faagasolo mai le po, na faamasani ona mata ma le susulu o le masina. Ua faasolo foi ona ia masani ma le feliu'a iina o le vaalaau. Na latalata ina maua i latou i nisi taimi, e se vaalele sami na fealua'i solo ma saili i latou. O le gogolo o ili o lona afi ma le malamalama o ona moli na avefa ma lapataiga ia Monike e su'e ai o latou lafitaga. Sa faapena foi i le puao mafiafia na tautau ifo i luga o le vai, sa natia ai i latou.

Ui i lea, sa toe itiiti lava maua i latou i se isi taimi, ina ua sesē le fika a Monike i se galugaluga, ma latou taia ai i se laau na pa'ō leotele. Na lagona mai e le vaalele sami ma sau saosasoa aga'i mai loa. Na ia taumafai malosi e faalafi i latou i lalo o lālā laau na tautau ifo, peitai sa mautinoa lava e iloa mai i latou pe ana autilo latalata teisi mai. Na maua le lavea'i mai se mea sa le'i mafauina.

A o tau faalēmū ifo le alu a le vaalele sami ma tape lona afi, na piilima Kisika ma tuu a'e i lona gutu, mānava tele i totonu, ona toe feula mai lea i fafo i se leo oolo pei e faali'i a se tama'i povi. Na latou faalogoina soo le valaau a le leo lea i le po. Na manatua e Monike le faataitai e le teine o lana taleni, o lana faalogo lelei i leo ma tagi, ma na faata'ita'i i ai i tagi a manu e matua'i tutusa lelei. Na saili pea le au fanafana, a e ua faaitiitia, ma faasolo atu ai pea i luma ina ua mae'a se minute.

Peitai sa latou lē faalagolago pea i lena laki. Aemaise o le itu e sili ona leaga, na iloa e Monike ua latou agai atu pea ma latalata i le Vai o Karakei ma le malolosi o ona kasa oona faaleitiō. Na matuā saili faatapito e le vaalele sami vaega saogalemu o le taufusi, ona tuua ai lea o le auala e tasi mo i latou: ia faalatalata atili i le itu o tafe i ai le vai.

O itula taitasi, na tutu ai e Monike se laau afitusi e tasi e siaki ai le lanu o le latou mita fua kasa. O le lapataiga sa lanu piniki ua liua atoa nei i le lanu mūmū. Na logoina Monike e Konesetatino, o le aso atoa i le fua lena, e tuatuagia leaga e lē saogalemu. A o aloalo atu e Monike lo latou vaa i le va o laulaau ma limulimu tafea, na ia lagona le mageso lemu mai o le pa'u o lona tino, ma lona iloa ua sau sau malie le faa'ōnā o ia.

Ma o tamaiti foi e sili ona faigofie ona pisia.

Na momoe faaputuputu le toatolu, faatasi ai ma Marata i luga o le vaalaau. Na moe te'ite'i oso valevale i se pa'ō po o se tagi a se lulu i totonu o le taufusi i le po. Mulimuli ane ona oo lea o Marata i luga o laau. Sa faapea lava ona ia fai soo i isi taimi, ma faaliliu ese ai le au fanafana sa tuliloaina i latou, faapea le vaalele sami i le isi itu. Na atoa le itula o latou saogalemu mai lenei faiga a Marata. O se manuki atamai tele. A e na talosia e Monike, ia poto ma atamai e tusa ma lona faamoemoe – ona e sili atu le mata'utia o loo faatalitali mai, nai lo le taufaamata'u o kasa oona.

Na tatafa mai ata i le itu i sasa'e ua lata mai le ao. Pe afai e leai le ufitia e le pogisa, o le a faigofie ma vave ona maua i latou. E tatau ona latou maua se auala latou te lalafi ma lilo ai.

O lona uiga o lena mea, o le faataatia o se auala o fasi falaoa.

O Konesetatino ma Kisika na la'ua saesaeina pepa sa afifi ai a latou sukalati ma faaputuputu a

latou atigi fagu vai. A o tau seuseu atu e Monike le vaa i totonu o vaovao, na faalavelaveina ai ni asaga i totonu o le vao, a o tamaiti e toalua na la'ua faatoulu ifo momoimea o otaota i totonu o le vai. “Aua le soona faateleina,” na musumusu lapata'i atu ai Monike. “Ma ia faavalavala.”

Na alu le itula talu ai o su'e e Monike se pito e fetau lelei i le taufusi pogisa. Ma na i'u ina ia mauaina: o se alavaa umi toe pi'o, e laina ai i autafa ni pupuvao uilo mafiafia ma pupuvao o isi laau pogisa. E tatau ona sa'o ma fetau lelei le taimi e fai ai le latou gaiogai. E tasi lava le latou taumafaiga. Peitai, a o mamao ese le matafaga i le lua maila, ma le vave mai o le tafa o ata e malamalama ai, e tupu le faalavelave ia i latou pe afai latou te lē faatinoa le mea lea.

O le sui mulimuli o le latou vaega, o Piota, sa nofo i le ogatotonu o le vaa, o ona lima na fusi i autafa o ona vae. A o ia faalua, na ia autilo atu i le taumuli o le vaa, e peisea'i o loo ia autilo i ana uō o faatoulu ifo toega mea'ai i lalo, a e na iloa lelei e Monike o ona mata ma lana pupula e mamao ese le mea o loo ave i ai. Na taunuu loa i le mea e gata ai le vai, ona suigi atu lea e Monike le laau sa fai ma foe i luma ma tuu ifo loloto i lalo. Na tetee i ona tauau ma taofi ai le vaa. O iinei lea o le a fai ai la latou osofaiga.

Sa nofo Porisakova i autafa o le pailate o le vaalele sami. O nofoa o le vaalele sa faatutū maualuga a'e mai le fola alumini mafolafola. O la'ua luma atu na punonou ai le toalua o fitafita; o le tasi sa vaaia le moli sulu i luma o le vaa, a o le isi na umia lana fana i lona tau'au o loo sauni i taimi uma. O le uma ai o le lima itula o sailiga, na matuā tiga ai taliga o Porisakova i leo uma. O ona tua, sa taalili ai le afi ma ona ili. O le u'amea gau'i luga atu o pe'ape'a na patapatatū i taimi uma e taia ai. Sa faapena foi ona patapatatū le tapili o le vaa pe a taia i lala laau ma isi otaota.

O le pailate sa i ai le pupuni taliga e tasi o le vaa. O le tasi ona lima sa i le ave o le vaa, o le isi lima sa faataatia i luga o lona ave. O le manogi ma le asu o le kiso na punitia ai le masa o limulimu o le vai. Na latou faaitiiti atu i se avanoa o le vai lautele. Na faasusulu solo atu le sulu i pupuvao na sosolo i autafa. A o faasolo mai le po, na latou vaaia ai ni puua tataa ma ni 'oti, o aeto sesegi ma le fefefe, na ui ane foi i autafa o faatanoa o piva ma le tele o iniseti. O la latou sulu na faasegisegi

(fa'auau itulau 14)

TALA O LE GALUEGA, **MAOTA FAAFEAGAIGA** **EFKS LOIMATA O APAULA**

“Vivii atu ia outou i le ALII, auā e lelei o ia, e faavavau lava lona alofa.”

E faatulou atu ma le agaga fa’aaloalo tele e tatau ai. E faatalofa atu foi i le Suafa Manumalo o Iesu Keriso le Ao o le Ekalesia. O sina tala otooto e uiga i le galuega o le Fale o le Faifeau i le EFKS Loimata o Apaula i Papauta, pei ona faapaiaina i le Aso 06 Iulai 2024.

O le Aso 6 o Tesema 2023 na faia ai le lotu faafetai e tuuina ai i lalo le fale tuai o le faifeau sa i ai, ma talosia ai le amataina o le galuega o le fale fou.

E tusa ma le 6 masina na faatinoina ai lenei galuega, mai ia Tesema 2023 seia oo mai ia Iuni 2024. O le Afioga i le Tiakono ia Vaigalepa Tuli Taogaga ma le Faletua ia Tupai Allyson Taogaga, o se tasi lava o matafale lotu o lenei Ekalesia, na lafo i ai le faatuatuaga mo le fausia o lenei maota, e ala i la’ua kamupani faufale o le T&T Construction Ltd.

O le Susuga i le Aoao Fesoasoani, le Afioga ia Tagaloa Aolele Godinet na tofia e avea ma Ta’ita’i ma Inisinia o lenei galuega.

O le tau atoa o le galuega e aofia ai mea faufale ma le totogi o le kamupani faufale, e tusa ma le \$480,000.00. O le tau o meāfale ua faatotogaina ai lenei maota e le Mafutaga a Tinā, e tusa ma le \$60,000.00. Lona uiga o le tau atoa o le galuega, e tusa ma **\$540,000.00.**

E fia fa’aaogaina ai lenei avanoa, e faafetaia ai le agalelei o i latou uma sa tuu mai o latou tau’au e tauamo faatasi le avega, e ala i nai sailiga sa matou taumafai atu ai.

Lau Susuga i le Taitaifono ma le Laulau a le Fonotele. Lau Susuga i le Taitaifono ma le Laulau a Tamā o le Ekalesia. Susuga i Toeaina, Susuga i Faafeagaiga ma o outou Faletua. Le Paia o Aulotu, o Pulega ma Matagaluega uma o le Ekalesia i Samoa nei ma Atunuu e mamao. Faafetai, faafetai tele le agalelei.

E fia faamauiina foi le agaga faafetai i le Paia o le Aufaigaluega a le Atua mai isi Tapuaiga ma Ekalesia Kerisiano, tainane o nai o matou aiga, o

uo ma aumea mamae i Samoa nei ma Atunuu i fafo. Le Paia o le Malo, tainane o le Mamalu talagatā o Samoa, i ē uma na agalelei mai i lo matou tu’itu’i atu. Faafetai alofa, faafetai le agalelei.

Matou te tatalo ma le faanaunau i le Atua, ia to ifo faaua ona manuia, e toe faatutumu ai mea ua outou faagaogao ona o lenei Aulotu. Ia fai pea ma viiga o le Atua lenei galuega ua tino mai.

“Vivii atu ia outou i le ALII, auā e lelei o ia, e faavavau lava lona alofa.”

Ma le Fa’aaloalo,

Letupu FS & Helen Mata’utia
ma le EFKS Loimata o Apaula

LE PEROFETA MULIMULI

(mai le itulau 13)

ese ai le anoano o mata puiti ma le tele o isi manu ma iniseti sa tata’a i le vai. A e ui i lea, latou te le’i vaaia lava ni ataata po o faailoilo o le au sosola. Ma ua oo ina utiuti le penisini o le vaa, ua lata ina ...

Na faafuase’i le mānu a’e o le ‘e’ē i luga atu o le pa’ō o le afi o le vaalele. Na sau mai le itu taumatau. Na lagona foi e fītafita o i luma o le vaa. Na liliu ma faasino faatasi i ai le sulu ma le fana i le itu na sau ai le leo. Na tago atu Porisakova i le tau’au o le pailate ma faasino atu.

O le ataata o le malamalama o le sulu, na atagia ai se tino lapo’a o suigi atu i se avanoa vapiapi i le va o laau, ma toe mou atu i totonu o le vaomatua. Na iloa e Porisakova o se tasi o manu o le fale su’esu’e, na leiloa faatasi ma tamaiti.

O se manukī.

Na ū leotele le afi o le vaalele sami a o u’una’i atu e le pailate lona foeuli i luma. Na oso saosaoa atu le vaa i luma i le avanoa ma sosolo atu i le faamalu o ea. Na faalemu ina ua oo i le pito o le vai. O vaovao iinei sa pipi’o, faailoga o se tagata sa ui atu ai e fia oo i le isi pito.

Na faasino atu Porisakova i luma.

Lea ua maua...

(Soso’o atu Sulu Samoa Aokuso 2024)

MAUA ATA/KOPI SULU TUAI

O lona aso 3 o le masina nei na maua ai e le Ofisa o le Sulu Samoa se feiloaiga fiafia ma sui mai le Faletusi o le Univesite o Hawaii, na asiasi mai i le atunuu mo mataupu fesoota'i ma tusitusiga ma faamaumauga o tala ma mea tutupu faapitoa lava i le Pasefika. O tama'ita'i o Eleanor Kleiber ma lona soatau o Erica Dias, na saili mai se avanoa e talanoa ma faasoa ai ma le tatou Ekalesia faasino i le Sulu Samoa. O le faatagaga na tuuina mai e le Failautusi Aoao susuga Dr. Taipisia Leilua FS, na mafai ai ona maua lenei feiloaiga ma fetufaaiga taua tele. Na molimau ma ta'utino e nei sui, o loo teuina i le Univesite o Hawaii kopi o nisi Sulu Samoa tuai, mai le tausaga 1904 e oo mai nei. Ua latou faia le galuega o le faaliliu ma faamau i auala faatekonolosi faaonaponei, (digitize/digitalize), o Sulu Samoa tuai ina ia mafai ona teuina lelei ma saogalemu mo se taimi umi. Sa faapea foi ona faia fetufaa'iga o kopi o Sulu Samoa ua uma ona lolomi. Na tauaoina mai e i la'ua o kopi uma o Sulu Samoa o tausaga e pei ona ta'ua i luga (1904 - 1978), mo le tatou Ekalesia e ala i lona ofisa o le Sulu Samoa ma le ofisa o faamatalaga faatekolosi (Information/Internet Technology). Sa faapea foi ona tuuina atu ia te i la'ua o kopi o la tatou Pepa o masina ma tausaga latou te le'i maua.

Ua folafola mai foi le finagalo malie ai o le Univesite o Hawaii, e faasoa ma tuuina mai mo le silasila ma faitau a le EFKS, o nisi Sulu Samoa tuai e le o maua i le taimi nei, pe afai latou te maua atu i nisi tagata ma faalapotopotoga. Ma ua faapea foi ona tuuina atu le faatagaga, latou te tuuina atu ai kopi ma faamatalaga o lomina i le Sulu Samoa, mo nisi tagata ma faalapotopotoga latou te mana'omia. Mata o se faamanuiaga lenei mo le toatele o tatou tagata Samoa ma le EFKS, latou te le'i maua nei tala i mea na tutupu i le Ekalesia i tausaga ua mavae. E toatele foi nisi aiga o le a faamalieina, pe a maua tala o latou tua'a na malilili i ia taimi, aemaise suafa o le aufaigaluega sa mua i malae i le galuega i nuu ma aulotu a le tatou Ekalesia. E faafetaia ma viia le Atua i nei auala o faamanuiaga, e faalautele ai le silafia o le tala faasolopito o le EFKS. **F.Tolua**

FEAU O LE ASO, IULAI

2 Nofoaiga Tupu 16:7-10

Suiga Lelei mo Falepuipui

Ou te le'i falepuipui, a e ou te ta'utino atu sa loka a'u i le sela i se po e tasi, a o taavao i le talavou. E manatua pea lagona o le masiasi ina ua malama le taeao, fesaga'i ma alii ma tamaita'i o malu o le malo; aemaise le faanoanoa ina ua toe to manatu i mea na tutupu, na afua ai ona loka i matou ma a'u uo (o loo faipule nei le tasi, a o loo faifeau le isi). Pe tusa ma le lua tausaga o faasolo lo matou faamasinoga, ma faasala mulimuli ane ai i le sala tupe. Ou te ioe i le faamasinoga amiotonu sa faia mo i matou, a e sili le a'oa'iga na tupu ai le salamō ma toe fuata'iina ai le ola.

E lē amiotonu le mea na fai e Asa ia Hanani, i lona lafo o le perofeta i le falepuipui, a e le'i faia se faamasinoga e faamaonia ai se solitulafono, ma se faasalaga talafeagai. Ua manino le mata'u o le perofeta i le Atua, e afua ai lona lē fefe e tautala i Lana amiotonu, tuufaafeagai ma le lē anaana o le tupu i le Atua, Lē na filifilia le nuu ma ona ta'ita'i e aofia ai ma Asa. O suiga aupito sili ona lelei e faasino i soligatulafono, faamasinoga ma falepuipui, o le faaleleia atili lea o le faamasinoga amiotonu a le Atua, e ala i le sa'o o moliaga, faamaoni molimau, ia talafeagai faasalaga e tatau ai, ma ia lelei nofoaga e nofo sala ai pagota.

E manatua i lenei tala le mea na oo i ai Ioane le Papatiso, ina ua ia tautala e faailoa agasala a le tupu. A e sili le amiolētonu na fai e Roma ma Iutaia i lo tatou Alii o Iesu, na faasala ai o Ia i le faasatauro. O se feau tāua lenei le toe fafagu mai le faia o le faamasinoga amiotonu a le Atua. Auā, i totonu o lo tatou atunuu i lenei lava vaitau, ua laualuga i tala fe'avea'i, le mata'utia o soligatulafono, faaopopo i ai le lē faamaoni o moliaga, ma le leai o se amiotonu i nisi faamasinoga ma ona faasalaga. A ia sili foi ona toe fafagu mai le amiotonu o le aufaigaluega, i lona leo faaperofeta e tautala loto tele atu i faiga pi'opi'o a ta'ita'i, a o molimau i ai le atunuu ma le lalolagi, ma le silafaga paia a le Atua. Amene.

Filemoni 8-17, "12 Ou te faafoi atu ia te ia; ina e talia mai o ia, o lo'u lava tino ia."

Soloia Faiga Faapologa

O le tala faasolopito o lo tatou atunuu e iloa ai sa nofo pologa tagata o isi itumalo, i lalo o le pule a isi tupu sa manumalo i taua. Na oo mai i le vaiatau o taua a le lalolagi, ona pulea ai lea ma nofo pologa lo tatou atunuu i malo tetele o le lalolagi e i ai Amerika, Siamani ma Niu Sila, seia oo ina maua lo tatou malo saoloto i le 1962.

Na oo le aiga o Iakopo i Aikupito, ina ua faatau Iosefa o se pologa e ona lava uso. Mulimuli ane ona nofo pologa lea o Isaraelu i totonu o Aikupito mo le 400+ tausaga. Na maua le saolotoga o le Esoto; peitai sa toe nofo pologa foi Isaraelu, i le tele o malo tuaoi malolosi o le lalolagi, e i ai Filisitia, Aikupito, Asuria, Suria, Papelonia, Metai/Peresia, Eleni, seia aulia le Feagaiga Fou i le pule a Roma.

O le Tusi ia Filemoni, o le faatoga mamate a le aposetolo o Paulo ia Filemoni, e uiga ia Onesemo sa fai ma pologa a Filemoni. Ina ia ‘aua le toe vaai ia Onesemo o se pologa, a o se atalii, se tama fai po o se uso pele, e pei o le la’ua foi faia fou ua faia, talu le Tala Lelei ia Iesu. O se tatalo lava lea ina ia taofia ma soloia faiga faapologa uma i le lalolagi, aemaise i totonu o le li’o o le Tala Lelei ia Iesu Keriso. Auā o le toto o Keriso na maligi mai luga o le satauro, ua totogi uma ai aitalafu ma le nofo sala o le tagata i ana agasala. Ua saoloto tagata faatuatua uma, ua lē toe i ai se pologa. O sē ua pologa, ia avea o ia ma pologa a Keriso, e auauna ma tautua atu ia te Ia ma lona finagalo paia (1 Kori.7: 21 – 24). Ia faapea foi i faiga faapologa uma, i soo se vaega o le sosaiete o tagata. Ia soloia ma taofia loa.

Ia amata mai i totonu o tatou aiga, ina ua aveese uma faiga faapologa o loo atagia i le pule sauā a le sa’o o le aiga, o matua i fanau, faapea le faiga o nofotane, faiaivā, ma le tagata ese o loo mau ma oe. Faasolo atu i nuu ma afioaga i le pule malosi faa matai, e pei ona aliali mai i nei aso. Ma le faiga malo i ana tulafono ma faiga faavae. A ia sili ona manino i totonu o le Ekalesia a Keriso; ia ‘aua ne’i faia ni galuega ona o le fia lauiloa, a e faapologaina ai tagata lotu ma e fia mulimuli ia Keriso. Ia ‘aua le fa’aaogaina le suafa o le Atua, e faapologa ai tagata ona o mana’oga faaletagata, ia ta’uleleia igoa ma ia viia ai pulega ma taitaiga. Ia soloia uma loa faiga faapologa.

F. Tolua

Tusi Faitau: Luka 10:30-37

Manatu Autu: **Alu ma ia faapena ona fai**

O le faamoemoe o le tala i le Samaria Agalelei, ina ia tali ai fesili tofotofa a le a’oa’o tulafono Iutaia: (i) O le ā se mea na te faia, e maua ai le ola faavavau? E ui ina atagia le vaivai o lona talitonuga i le faaolataga, sa ia manatu o se mea na te maua i sana galuega e fai, a e na talia lelei e Iesu lona iloa o tulafono. O le feau tāua mo ia, ia alu ma ia faapea ona ia fai – ia ola mata’u ma tausii i ai, a e lē na o le tauloto o upu ma mataitusi o le tulafono. (ii) O ai lona tuaoi? O le faataoto na fai e Iesu na iloa ai e le a’oa’o fia tofotofa lona tuaoi. Na toe faamamafa atu e Iesu le feau ma le lu’i, ina ia alu ma ia faapea ona ola ai – e alofa atu i soo se tagata o puapuagatia, aemaise o ona fili, o lona tuaoi moni lona.

E fia tuliloa nisi vaega e tusa ma le manatu autu:

(i) O le au fao mea. *“ua fasi ia te ia, ua latou o, ua tuua o ia..”* O loo tele ituaiga faomea foliga eseese o loo sauā ma faapologaina le au faatuatua i nei aso. O nisi na fetalai ai Iesu, *“15 Ia outou ma perofeta pepelo, e o mai ia te outou i ofu faamamoe, a o totonu o luko feai lava i latou.”*

Mata.7. Ua tele ituaiga lotu ma tapuaiga fou. O nisi lotu o tagata ma aulotu lava a le EFKS, ua o ese faifeau ma ave nai tagata, e tausii i latou. Ia tatou faautauta ma mataala ina ne’i faateteleina lea faiga faafaomea faalēiloga.

(ii) O le pule, ma le faletalimalo. *“35 O le taeao ua ia to a’e ai tenari e lua, ma avatu i lē e pule i le fale talimalo...ai se mea e te toe faatau ai, ou te tau ai atu ia te oe pe a ou toe sau.”* E tusa ai

ma le faatusa alekoli o lenei tala, ua faauiga ai le Samaria ia Iesu, o le pule o le fale talimalo i aposetolo, o le fale talimalo i le Ekalesia, o tenari e lua i le Feagaiga Tuai ma le Fou, ma le valoaga i le toe afio faalua mai o Iesu. E tusa ma lea faauigaga, o loo tatou i ai nei i le periota o le nonofo i totonu o le faletalimalo, e faatali ai le toe afio mai o Keriso. O se feau faamanatu mai, o le Ekalesia, ia fai ma nofoaga e malu ma mapu ai soo se tagata mafatia, a e ‘aua le avea o se falepuipui, e faapologa ma saisaitia ai tagata lotu na tigaina Iesu e lavea’i ma faasa’oloto e ala i lona soifua atoatoa na liligi mai. Tatou o ia e fai lona finagalo, a e tuu o tatou loto. **F. Tolua**